

## CONVENIO ENTRE A CONSELLERÍA DO MEDIO RURAL E O CONCELLO DE XINZO DE LIMIA PARA A CONCESIÓN DUNHA AXUDA PARA A XESTIÓN DO CENTRO DE LIMPEZA E DESINFECCIÓN DE VEHÍCULOS DE TRANSPORTE NO SECTOR GANDEIRO

Dunha parte, don Silvestre José Balseiros Guinarte, en calidade de director xeral de Gandaría, Agricultura e Industrias Agroalimentarias, en virtude do Decreto 127/2020, do 10 de setembro polo que se dispón o seu nomeamento, actuando en nome e representación da Consellería do Medio Rural, por delegación do conselleiro, en virtude das facultades delegadas que lle confire a Orde do 17 de novembro de 2015, publicada no DOG número 223 do 23 de novembro.

E doutra, Dona Elvira Lama Fernández, actuando en nome e representación do Concello de Xinzo de Limia, na súa calidade de alcaldesa, en virtude das facultades representativas que lle atribúe o artigo 61 da Lei 5/1997, do 22 de xullo, da Administración local de Galicia.

Cada unha das partes interveñen en función do seu cargo, no exercicio das facultades que para convir en nome das entidades que representan teñen conferidas, recoñecendo mutua e respectiva competencia e capacidade suficiente para formalizar o presente convenio.

### EXPOÑEN

**Primeiro.** Segundo o establecido no artigo 30.1.3 do Estatuto de Autonomía de Galicia, a Comunidade Autónoma de Galicia ten a competencia exclusiva en materia de agricultura e gandería, de acordo coas bases e a ordenación da actuación económica xeral e a política monetaria do Estado.

**Segundo.** Entre outras funcións, a Consellería do Medio Rural ten as competencias xerais en materia de gandería e, particularmente, é competente en relación coa protección e control da sanidade animal; a análise e planificación da execución e seguimento dos programas de prevención, loita, control, vixilancia e erradicación das enfermidades dos animais, epizootias e zoonoses, así como das alertas sanitarias dos animais, e outras medidas para o establecemento de garantías sanitarias e da rastrexabilidade das producións gandeiras; e a ordenación, fomento e control das condicións hixiénico sanitarias dos medios de produción gandeiros, tal como se recolle no Decreto 149/2018, do 5 de decembro, polo que se establece a estrutura orgánica da Consellería do Medio Rural e se modifica parcialmente o Decreto 177/2016, do 15 de decembro, polo que se fixa a estrutura orgánica da Vicepresidencia e das consellerías da Xunta de Galicia.



**Terceiro.** A Lei 5/1997, do 22 de xullo, da Administración local de Galicia, atribúelle aos concellos competencias, nos termos establecidos pola normativa estatal e autonómica, en materia de abastos, matadoiros, feiras, mercados e defensa dos usuarios e consumidores; protección medio ambiental e da salubridade pública.

**Cuarto.** O artigo 49 da Lei de Sanidade Animal establece a obriga de que os vehículos ou medios de transporte de gando utilizados, unha vez realizada a descarga de animais, deben ser limpados de residuos sólidos, lavados e desinfectados con produtos autorizados, no centro de limpeza e desinfección máis próximo habilitado para tal fin, o cal expedirá un xustificante do labor realizado, que deberá acompañar ao transporte.

**Quinto.** As actividades a desenvolver enmárcanse no disposto no Real Decreto 638/2019, do 8 de novembro, sobre condicións básicas que deben cumprir os centros de limpeza e desinfección dos vehículos dedicados ao transporte por estrada de animais vivos, produtos para a alimentación de animais de produción e subprodutos de orixe animal non destinados ao consumo humano, e se crea o Rexistro nacional de centros de limpeza e desinfección. Este regula e establece as condicións básicas de equipos, instalacións e funcionamento dos centros de limpeza e desinfección de vehículos dedicados ao transporte por estrada dos animais de produción, de produtos para a alimentación dos ditos animais, e dos subprodutos de orixe animal non destinados ao consumo humano; e indica os requisitos mínimos para a súa autorización, as normas para o seu funcionamento, a documentación a expedir tras a limpeza e desinfección, os rexistros que deben levar os centros, e as normas para a realización da correcta limpeza e desinfección.

**Sexto.** Os vehículos dedicados ao transporte por estrada no sector gandeiro constitúen un elemento importante dentro da produción e sanidade gandeira, supoñendo os seus desprazamentos un risco na difusión e propagación das enfermidades infecto-contaxiosas dos animais. Deste xeito, a limpeza e desinfección de vehículos utilizados para o transporte de animais adquire gran importancia sanitaria, non só cando os traslados se realizan entre explotacións ou con destino a un matadoiro, senón de xeito especial cando teñen como destino ou orixe unha feira, onde se concentran animais de diferentes procedencias. No caso de Galicia, o número de vehículos é proporcional ao elevado número de explotacións gandeiras, polo que a súa repercusión a nivel sanitario aínda resulta máis significativa.

Neste sentido, non debe esquecerse que Galicia e España son receptoras de numerosas partidas de animais procedentes dos restantes países europeos, nalgúns dos cales se detectaron brotes de enfermidades de gran difusibilidade, como a peste porcina africana, polo que os transportes de animais supoñen un continuo risco de aparición de enfermidades ausentes no noso territorio.



Ademais, debido á súa situación xeográfica, España é lugar de paso de vehículos de transporte de animais vivos con destino a terceiros países no norte de África, non só con orixe no noso propio país, senón doutros países da Unión Europea (UE), así como de vehículos que dende o norte de África se desprazan baleiros para cargar animais en Europa. Estes vehículos entran en contacto con explotacións gandeiras de terceiros países, supoñendo un elevado risco sanitario para a nosa cabana gandeira, risco especialmente grave se temos en conta a situación sanitaria destes países, afectados de enfermidades de elevada transmisibilidade e incluídas na lista de enfermidades de declaración obrigatoria na UE, como a Febre aftosa, a Peste dos pequenos ruminantes ou a Viruela ovina e cabrúa.

**Sétimo.** A Comunidade Autónoma de Galicia é orixe e destino de numerosos intercambios comerciais de animais vivos e produtos de orixe animal, especialmente con diferentes rexións españolas, e tamén con diversos países da Unión Europea, sendo esta actividade fundamental no mantemento da economía rural galega, ata o punto de que a aparición e propagación de calquera das enfermidades animais obxecto de restricións nos movementos de animais ou produtos terían importantes repercusións económicas sobre todo o sector gandeiro.

Por outra banda, a aparición de determinadas enfermidades transmisibles dos animais obxecto de restricións obrigaría a adoptar custosas medidas para o seu control e/ou erradicación, o que tería efectos económicos directos sobre a propia administración e os posuidores dos animais afectados.

**Oitavo.** Determinadas enfermidades transmisibles dos animais poden ter significativas repercusións na saúde pública e na seguridade alimentaria, polo que resulta fundamental dende o punto de vista da saúde humana tomar todas as medidas necesarias para evitar a súa aparición e, no seu caso, difusión.

**Noveno.** Unha das prioridades da Consellería do Medio Rural e da Xunta de Galicia é manter a actividade agropecuaria, como medida para fixar poboación no rural e evitar o despoboamento, polo que é imprescindible adoptar todas as actuacións que aseguren a sanidade animal, fortalecendo a rendibilidade das producións gandeiras.

**Décimo.** A Comarca de Xinzo de Limia é unha zona de intensa actividade agropecuaria, resultando evidente o interese do Concello de Xinzo de Limia por manter e fomentar as actividades gandeiras, contribuír á súa rendibilidade económica, fixar poboación e asegurar a saúde pública.

**Undécimo.** A Lei 9/2007, do 13 de xuño, de subvencións de Galicia, prevé a concesión directa de subvencións cando se acrediten razóns de interese público, social ou económico. No mesmo senso, exprésase o artigo 36.c do Decreto 11/2009, do 8 de xaneiro, polo que se aproba o regulamento da



lei. Por outra parte, o artigo 40.1 do mesmo decreto regula a concesión de subvencións directas mediante convenio, nos casos en que se acrediten razóns de interese público, social ou económico.

**Duodécimo.** Tendo en conta o evidente interese público, social e económico da actividade, a Consellería do Medio Rural e os concellos veñen colaborando dende hai anos no mantemento deste servizo; e cómpre seguir traballando no mesmo sentido para consolidar os bos resultados obtidos ata o de agora e, así, contribuír a evitar a difusión e propagación das enfermidades infecto-contaxiosas dos animais.

O desenvolvemento destas actuacións no ámbito xeográfico deste concello, so é posible coa participación da Administración Local de Xinzo de Limia, xa que ante a ausencia total de iniciativa privada neste campo, é a única entidade que conta co persoal necesario, así como experiencia na xestión do centro. Nestas condicións o procedemento ordinario de concorrencia competitiva na concesión de subvencións resulta improcedente, por canto a entidade destinataria resulta imprescindible para acadar os obxectivos perseguidos.

Por tanto, asumindo que a realización daquelas actividades que contribúan ao mantemento do status sanitario do sector gandeiro reúne as condicións aludidas na lei e o regulamento de subvencións, e que as actuacións previstas no presente convenio resultan necesarias para previr a difusión e propagación das enfermidades infecto-contaxiosas dos animais, evitar os seus efectos económicos negativos, favorecer o mantemento da actividade gandeira e a poboación rural, e asegurar a saúde pública e a seguridade alimentaria, enténdese a procedencia da sinatura dun convenio entre a Consellería do Medio Rural e o Concello de Xinzo de Limia para a concesión dunha axuda para a xestión do centro de limpeza e desinfección de vehículos de transporte no sector gandeiro.

A finalidade do convenio axústase aos fins e obxectivos do Concello de Xinzo de Limia, obxectivos compartidos coa Consellería do Medio Rural.

**Décimo Terceiro.** En virtude do anterior, e acreditado que o Concello de Xinzo de Limia cumpre cos requisitos establecidos para obter a condición de beneficiario, segundo o artigo 10 da Lei 9/2007, do 13 de xuño, de subvencións de Galicia, ámbalas dúas partes acordan asinar o presente convenio de acordo coas seguintes:



## CLÁUSULAS

### **Primeira. Obxecto**

O obxecto do presente convenio é establecer as condicións nas que se concederá unha axuda ao Concello de Xinzo de Limia para conservar e explotar o centro de limpeza e desinfección de vehículos de transporte no sector gandeiro existente no dito concello.

### **Segunda. Obrigas do Concello de Xinzo de Limia**

O Concello de Xinzo de Limia realizará a prestación do servizo de limpeza e desinfección de vehículos de transporte no sector gandeiro no centro de limpeza e desinfección localizado no dito concello, asumindo a súa xestión, coas seguintes obrigas:

- a) Aportar o persoal necesario para a prestación do servizo de limpeza e desinfección.
- b) Realizar o mantemento dos equipos e instalacións.
- c) Achegar os materiais necesarios para a realización dos labores de limpeza e desinfección.
- d) Realizar a limpeza e desinfección dos vehículos segundo as normas establecidas no Real Decreto 638/2019.
- e) Expedir a través do seu persoal o certificado ou talón de desinfección pertinente que xustifique a realización da limpeza e desinfección de cada vehículo.
- f) Colocar, mediante o seu persoal, o oportuno precinto sobre as portas ou elementos de acceso do gando dos vehículos limpados e desinfectados, figurando no precinto o número de rexistro do centro e o número do precinto.
- g) Levar un rexistro, que se conservará ao menos durante tres anos, cos datos das matrículas dos vehículos limpados e desinfectados (incluída, no seu caso, a do remolque), ou no seu defecto número de bastidor, a data e hora de inicio e finalización das tarefas, o biocida de uso gandeiro, ou no seu caso as condicións do tratamento desinfectante utilizado, o número de certificado ou talón expedido, e o nº de precinto colocado.
- h) Conservar, ao menos durante un ano, copia de cada certificado ou talón expedido.

### **Terceira. Financiamento**



A Consellería do Medio Rural financiará as actuacións do convenio con cargo á aplicación orzamentaria 14.04.713E.460.1, por un importe total de 24.000,00 € durante os seguintes exercicios orzamentarios e co importe máximo de:

- 2022: 6.000,00 €. Para este ano as actuacións subvencionables serán as levadas a cabo desde o 1 de xaneiro.

- 2023: 6.000,00 €

- 2024: 6.000,00 €

- 2025: 6.000,00 €

Este expediente tramítase como anticipado de gasto ao abeiro da posibilidade prevista no artigo 1 da Orde do 11 de febreiro de 1998, que regula a tramitación anticipada de expedientes de gasto, modificada respectivamente pola Orde do 27 de novembro de 2000 e pola Orde do 25 de outubro de 2001 e queda condicionado á existencia de crédito axeitado e suficiente nos orzamentos xerais da Comunidade Autónoma de Galicia que se aproben para o ano 2022.

#### **Cuarta.- Gastos subvencionables**

Con carácter xeral, e de acordo co establecido no artigo 29 da Lei 9/2007, do 13 de xuño, de subvencións de Galicia tan só se consideran subvencionables aqueles gastos que dun xeito indubidable respondan á natureza das actividades recollidas na cláusula segunda deste convenio. Achégase no Anexo I o cadro orzamentario orientativo coas actuacións a desenvolver polo Concello de Xinzo de Limia.

O Imposto sobre o valor engadido (IVE) só se considera financiable no caso de que non sexa susceptible de recuperación ou compensación. Nese caso, deberase presentar a xustificación documental de non suxeición ou exención do imposto emitida pola Axencia Española de Administración Tributaria.

En ningún caso o custo de adquisición dos gastos subvencionables poderá ser superior ao valor do mercado.

Considérase gasto realizado cando se teña contabilizado o recoñecemento da obriga polo órgano competente da entidade local.

#### **Quinta. Xustificación**



O Concello de Xinzo de Limia estará obrigado a xustificar ante a Consellería do Medio Rural, antes do 1 de decembro da anualidade correspondente, o cumprimento da finalidade do convenio e o seu custo real, mediante a presentación dunha conta xustificativa integrada, con carácter xeral, pola seguinte documentación:

a) Certificación expedida pola Secretaría da entidade local, co visto e praxe do/a alcalde/sa, relativa á aprobación polo órgano competente da conta xustificativa do convenio en que se faga constar, como mínimo, de forma detallada:

1. O cumprimento da finalidade da subvención.
  2. Os distintos conceptos e contías correspondentes aos gastos totais soportados pola entidade beneficiaria imputables á actuación subvencionada coa seguinte relación: actuación/concepto, identificación do/a acredor/a, NIF, número de factura ou documento equivalente, importe sen IVE, IVE, importe total, data de emisión e data de recoñecemento da obriga polo órgano competente. Non será esixible a remisión dos documentos relacionados no artigo 48.2 b) do Regulamento da Lei 9/2007, do 13 de xuño, de subvencións de Galicia, aprobado polo Decreto 11/2009, do 8 de xaneiro.
- b) Os documentos acreditativos dos gastos realizados con medios ou recursos propios, e a indicación, no seu caso, dos criterios de reparto dos custes xerais e/ou indirectos incorporados na relación que se fai referencia no apartado a).
- c) Declaración de que só se percibe este importe para esta finalidade.

Toda a documentación incluída na xustificación presentarase por vía telemática, de acordo co artigo 14.2 da Lei 39/2015, do 1 de outubro, do procedemento administrativo común das Administracións Públicas.

A consellería resérvase o dereito de solicitar toda a documentación que considere precisa en relación coas actividades realizadas no marco do convenio.

Poderanse efectuar pagamentos a conta, pagamentos fraccionados que responderán ao ritmo de execución das accións subvencionadas, sempre de acordo co disposto nos artigos 62 e 65.4 do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia, abonados por contía equivalente á xustificación presentada a conta da liquidación final. O importe do pagamento a conta poderá acadar ata o 80 % da contía anual concedida.



### **Sexta. Relacións laborais**

A subscripción do convenio non supón relación laboral contractual ou de calquera outro tipo entre os profesionais e os empregados do centro de limpeza e desinfección do Concello de Xinzo de Limia e a Xunta de Galicia.

### **Sétima. Comisión de seguimento**

Para avaliar o desenvolvemento do convenio constituirase unha comisión de seguimento composta por un representante de cada institución asinante:

- Por parte da Consellería do Medio Rural: O subdirector xeral de Gandería
- Por parte do concello: A alcaldesa-presidenta, ou persoa en quen delegue.

Será a encargada de coordinar, supervisar e realizar o seguimento das actuacións do mesmo, así como de propor e deseñar medidas e actuacións que redunden no éxito da súa aplicación.

A comisión de seguimento reunirse 1 vez ao ano, con carácter ordinario, co fin de avaliar o desenvolvemento das actuacións levadas a cabo, e, con carácter extraordinario, sempre que o solicite algún dos seus membros.

A Consellería do Medio Rural ostenta a prerrogativa da interpretación e resolución de cantas dúbidas e controversias xurdan na aplicación do convenio.

### **Oitava. Informes**

O Concello de Xinzo de Limia elaborará anualmente un informe analítico das actividades realizadas no marco do convenio, informe que presentará antes do día 15 de xaneiro do seguinte ano, e aqueles informes que a Consellería considere necesarios para a correcta avaliación do mesmo. O informe deberá cuantificar as actuacións realizadas e indicar o número de vehículos limpados e desinfectados no centro.

No último ano da duración do convenio, incluírá tamén unha análise do cumprimento das obrigas asumidas coa sinatura do presente convenio.

### **Novena. Controis**

A Consellería do Medio Rural exercerá o seguimento e control das actuacións obxecto do convenio co persoal técnico da Dirección Xeral de Gandería, Agricultura e Industrias Agroalimentarias.



O beneficiario ten a obriga de facilitar toda a información que lle sexa requirida pola Intervención Xeral da Comunidade Autónoma, polo Tribunal de Contas e polo Consello de Contas no exercicio das súas funcións de fiscalización e control do destino das subvencións.

O Concello de Xinzo de Limia comprométese a colaborar na execución dos controis nos termos que se precisen. Igualmente, acepta someterse aos controis que legalmente procedan a cargo da Intervención Xeral da Xunta de Galicia e do Consello de Contas.

#### **Décima. Incompatibilidade**

A percepción dunha achega con base a este convenio, será incompatible con calquera outra que poida obterse de calquera Administración ou ente público ou privado, nacionais, da Unión Europea ou de organismos internacionais para a mesma finalidade.

#### **Undécima. Obriga de reintegro**

A entidade perceptora dos fondos comprométese a cumprir as obrigas que como beneficiaria dunha subvención sinala o artigo 11 da Lei 9/2007 de subvencións de Galicia.

A entidade ten a obriga de reintegrar, total ou parcialmente, a achega percibida xunto cos xuros de demora que correspondan, nos supostos previstos no artigo 33 da Lei 9/2007 de subvencións de Galicia.

#### **Duodécima. Resolución**

Son causas de resolución do presente convenio: o incumprimento total ou parcial dalgunhas das súas cláusulas, o transcurso do tempo estipulado sen que se culminen as actividades acordadas, e as modificacións das directrices de desenvolvemento sen contar coa previa autorización escrita da Consellería do Medio Rural.

#### **Décimo Terceira. Consentimento**

O Concello de Xinzo de Limia autoriza á Consellería do Medio Rural a obtención de forma directa da acreditación do cumprimento das súas obrigas tributarias coa Axencia Estatal da Administración Tributaria, coa Consellería competente en materia de Facenda da Xunta de Galicia e coa Tesouraría Xeral da Seguridade Social, a través de certificados telemáticos.

Así mesmo, as partes asinantes deste convenio outorgan o seu consentimento para que os datos persoais e o resto das especificacións que constan no citado convenio sexan publicados no Portal de Transparencia e Goberno Aberto e no Rexistro de Convenios da Xunta de Galicia, de acordo co establecido no artigo 15 da Lei 1/2016, do 18 de xaneiro, de transparencia e bo goberno, no Decreto



126/2006, do 20 de xullo, polo que se regula o Rexistro de Convenios da Xunta de Galicia, e en concordancia cos artigos 14 e seguintes da Lei 19/2013, do 9 de decembro, de transparencia, acceso á información pública e bo goberno.

#### **Décimo Cuarta. Natureza**

Este convenio ten natureza administrativa e rexerese polas súas propias cláusulas e pola Lei 9/2007, do 13 de xuño, de subvencións de Galicia, o Decreto 11/2009, do 8 de xaneiro, polo que se aproba o Regulamento da citada lei, e o Decreto 193/2011, do 6 de outubro, polo que se regulan especialidades nas subvencións ás entidades locais galegas.

A xurisdición contencioso - administrativa será a competente para entender os litixios que puideran xurdir.

#### **Décimo Quinta. Vixencia do convenio**

A duración do presente convenio, que producirá efectos dende o 1 de xaneiro de 2022, rematará coa finalización das accións obxecto do mesmo o 31 de decembro de 2025.

#### **Décimo Sexta. Tratamento de datos de carácter persoal**

As partes asinantes obríganse ao cumprimento do Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación deses datos e polo que se derroga a Directiva 95/46/CE (Regulamento xeral de protección de datos), da Lei orgánica 3/2018, do 5 de decembro, de protección de datos persoais e garantía dos dereitos dixitais, do Real Decreto 1720/2007, do 21 de decembro, polo que se aproba o Regulamento de desenvolvemento da LOPD, e demais normativa vixente de aplicación en cada momento en materia de protección de datos.

E en proba de conformidade, asinan o presente convenio.

O conselleiro do Medio Rural

A alcaldesa do Concello de Xinzo de Limia

P.D. Orde do 17/11/2015

Asinado dixitalmente

(DOG 223, do 23/11/2015)

Elvira Lama Fernández

O director xeral de Gandaría, Agricultura  
e Industrias Agroalimentarias

Asinado dixitalmente

Silvestre José Balseiros Guinarte



## ANEXO I

### CADRO DE ACTUACIÓNS E CUSTOS ANUAIS ESTIMADOS

As actuacións e tipos de gasto reflectidos no cadro corresponden a cada un dos catro anos de vixencia do convenio.

CONCEPTO	TIPOS DE GASTO	IMPORTE
PERSOAL	– Nóminas do persoal asignado ás tarefas do convenio	5.500
MATERIAL	– Desinfectantes e material de limpeza	250
DOCUMENTACIÓN	– Talonarios e precintos xustificativos de limpeza e desinfección	250
<b>TOTAL</b>		<b>6.000 €</b>

